

COMMUNICAZIUN A LAS MEDIAS

Claustra, ils 13 da mars 2026

Madrisa Solar revalorisescha prads sitgs prezios cun agid da mesiras substitutivas ecologicas

En il rom da ses project solar realisescha la Madrisa Solar AG en il territori da Rufinetia sur Saas mesiras substitutivas directas a favur da l'ecologia. Sin ina surfatscha parziala da pastgiras e prads sitgs d'importanza naziunala revalorisescha ella sistematicamain in spazi vital ritg da spezias e segirescha quel a lunga vista.

Il project Madrisa Solar è vegnì planisà uschia ch'ins po trair a niz a moda effizienta infrastructuras existentas e minimar intervenziuns en la natira e la cuntrada. Sche quellas èn tuttina necessarias, cumpensescha la Madrisa Solar AG ellas cun gronda responsabladad. Quest'emna han ins cumenzà a realisar las mesiras substitutivas a favur da l'ecologia. Pertutgada è ina surfatscha da var 15'500 m² en in' autezza da 1050 fin 1090 m s.m. sin l'intschess da la vischnanca da Claustra. Uschia vegn la cumpensaziun ecologica realisada en la vischnanca, nua che vegn era fatga l'intervenziun. En il territori da Rufinetia creschan numerusas spezias da plantas raras, tranter auter differentas orchideas e spezias che vegnan consideradas sco potenzialmain periclitadas. Planisadas èn differentas mesiras che promovon il character avert e ritg da spezias da la zona. En spezial vul ins:

- allontanar singulas plantas e tagliar bostgaglia resguardond il mantegniment da spezias tipicas dal lieu
- debostgar e tagliar periodicamain collers
- cumbatter durant plirs onns il felesch d'evla
- pascular e tgirar meglier ed a moda adattada il spazi da viver sensibel
- transferir pass per pass las parts da la surfatscha nuncultivadas en in areal da cultivaziun annuala

Las mesiras succedan en stretga coordinaziun cun l'Uffizi per la natira e l'ambient, l'Uffizi da gaud e privels da la natira ed il manaschi forestal regional. La vischnanca da Claustra è la proprietaria dal terren. Per la cultivaziun è responsabla ina cuminanza da cultivaziun locala. Suentar tschintg onns è previs in rapport intermediar. La tgira e la preservaziun a lunga vista da la surfatscha è planisada per in spazi da temp da plirs onns.

Quai è Madrisa Solar

Madrisa Solar è in project che cumpiglia in implant alpin d'energia solara da la vischnanca da Claustra, l'EKZ e Repower. Il project vegn realisà en il rom da l'offensiva solara naziunala Solarexpress, ina lescha che vul promover l'electricitad d'enviern en Svizra. Dapi il settember

2025 producescha Madrisa Solar electricitad - sco emprim implant alpin d'energia solara en il Solarexpress. Cun agid dal project contribuescha la Madrisa Solar AG essenzialmain al provediment d'electricitad segir cun energia regenerabla en Svizra. Enfin la fin dal 2027 duai l'implant en il Partenz esser en funcziun dal tuttafatg.

Contacts

Repower AG
post da medias
t +41 81 423 77 00
medien@repower.com

EKZ
post da medias
t +41 58 359 52 55
medienstelle@ekz.ch

Vischnanca da Claustera
Andres Ruosch
t +41 76 344 26 28
andres.ruosch@gemeindeklosters.ch

Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milaun. Repower è activa lung l'entira chadaina da valurisaziun da l'electricitad, da la produenziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.

EKZ

Las Ovras electricas dal chantun da Turitg EKZ èn ina da las furnituras d'energia las pli grondas da la Svizra e provedan var in milliun umans a moda fidada cun forza electrica regenerabla per 100 pertschient. Las var 1570 collavuraturas e collavuratur da la gruppa EKZ s'engaschan per in avegnir energetic persistent: cun amplifitgar l'energia eolica, idraulica e solara e cun porscher tecnologias smartas sco pussaivladads da chargiar per l'electromobilitad. Las EKZ planiseschan, construeschan e mantegnan ina rait electrica da prest 17 000 kilometers lunghezza ch'è disponibla surproporziunalmain cun 99,998 pertschient. Da la clientella da las EKZ fan part personas privatas, interpresas ed autras furnituras d'energia svizras. Sco ina da las interpresas d'emprendissadi las pli grondas en il chantun da Turitg scoleschan las EKZ 155 spezialistas e spezialists en diesch professiuns cun emprendissadi.